

每週經課朗誦經文(巴克禮漢羅/教羅)2014/08/31

共同經課 - 1 出埃及記三章一節~十五節

1 摩西顧伊 ê 丈人，米甸 ê 祭司，Iáp-thek-lô，ê 羊群，趕羊去曠野 ê 後面，到上帝 ê 山，就是何烈山。2 耶和華 ê 使者 tī 刺 phè 內火箴中對伊出現，伊看見，看 ah，刺 phè hō 火燒，刺 phè 也無 tòh 去。3 摩西講：我 taⁿ beh oat 過去，看 chit-ê 地 ê 景象，chit-ê 刺 phè 怎樣無 tòh 去 ah。4 耶和華看見伊 oat 去 beh 看，上帝就對刺 phè 內叫伊講：摩西，摩西。伊就講：我 tī-chia。5 伊就講：你莫得近 oá 來；tiòh thng 你腳裡 ê 鞋，因為你 khiā ê 所在是聖地。6 Koh 講：我是你 ê 祖公 ê 上帝，亞伯拉罕 ê 上帝，以撒 ê 上帝，雅各 ê 上帝。摩西遮伊 ê 面；m̄敢看上帝。7 耶和華講：我 ê 百姓 khiā 起 tī 埃及 ê，in ê 困苦我實在已經看見 lah；in 為 tiòh 督工 ê 來喉叫，我已經聽見 lah；我本知 in ê 痛苦。8 Taⁿ 我落來 beh 救 in 脫離埃及人 ê 手，chhoā in 出 hit-ê 地，到肥 súi 開闊 ê 地，到流奶 kap 蜜 ê 地，就是迦南、Hek、A-mô-lī、Pí-lī-sé、Hi-bī、Iâ-pò-su、hiah-ê 族 ê 所在。9 Taⁿ 以色列人喉叫 ê 聲到 hō 我聽見；我也看見埃及人苦楚 in ê 艱苦。10 Taⁿ 你來，我 beh 差你去見法老，chhoā 我 ê 百姓以色列人出埃及。11 摩西對上帝講：我是甚麼人 thang 去見法老，chhoā 以色列人出埃及 ah？12 伊講：我實在 beh kap 你 tī-teh；你 chhoā 百姓出埃及了後，lín beh tī chit-ê 山服事上帝；這 beh 做我差你 ê 證據。13 摩西對上帝講：看 ah，我到以色列人 hia，對 in 講：Lín 祖公 ê 上帝差我來 lín chia；in 若問我講：伊叫甚麼名？我 beh kā in 講甚麼 ah？14 上帝對摩西講：我是自然而然 ê；koh 講：你 tiòh kā 以色列人 án-ni 講：自然 ê 差我到 lín chia。15 上帝 koh 對摩西講：你 tiòh 對以色列人 án-ni 講：差我到 lín chia ê，就是耶和華，lín 祖公 ê 上帝，亞伯拉罕 ê 上帝，以撒 ê 上帝，雅各 ê 上帝；這是我永遠 ê 名，這是我 ê 記念到萬代。

共同經課 - 2 詩篇一百零五篇一節~六節，二十三節~二十六節，四十五 c 節

1 Lín tiòh 感謝耶和華，求叫伊 ê 名；Tī 萬百姓 ê 中間報揚伊 ê 所做。2 Tiòh òng 伊詩，òng 伊唱歌 o-ló，談論伊一切奇妙 ê 所行。3 Tiòh 因為伊 ê 聖名來誇口；Chhē 耶和華 ê 人，心內 tiòh 歡喜。4 Tiòh 求耶和華 kap 伊 ê 權能；常常 chhē 見伊 ê 面。5 伊 ê 奴僕亞伯拉罕 ê 後裔，伊所揀雅各 ê kiáⁿ 孫 ah，Lín tiòh sià 念伊所做奇妙 ê 事，Kap 伊 ê 神跡，kap 伊 ê 嘴判斷 ê 話。6 b，23 以色列亦到埃及，雅各出外 tī 含 ê 地。24 耶和華 hō 伊 ê 百姓生炭 choē-choē；Hō in 比對敵 khah 強。25 伊變換對敵 ê 心，怨恨伊 ê 百姓，續用詭譎 ê 計謀款待伊 ê 奴僕。26 伊差伊 ê 奴僕摩西，Kap 伊所揀 ê 亞倫。45 Lín tiòh o-ló 耶和華。

共同經課 - 3 羅馬書十二章九節~二十一節

9 疼，tiòh 無假；怨恨 pháiⁿ，親近好；10 疼兄弟，tiòh 相親愛；敬重人，tiòh 相推尊；11 論慇勤，m̄-thang pîn-toāⁿ；論心志，tiòh 熱熱；論主，tiòh 服事；12 tī òng 望 tiòh 歡喜；tī 患難 tiòh 吞忍；tī 祈禱，tiòh 常常；13 聖徒所欠缺 ê，就供給伊；出外人，tiòh 致意好款待 in。14 Khún-tiòk lín ê，tiòh kā in 祝福；tiòh 祝福，莫得咒詛。15 Kap 歡喜 ê 人 saⁿ-kap 歡喜；kap 啼哭 ê 人 saⁿ-kap 啼哭。16 相款待，tiòh 同一樣 ê 心；心志莫得好高；tiòh 膝就卑微 ê；莫得掠家己做有知識。17 莫得用 pháiⁿ 報 pháiⁿ；tī 眾人 ê 面前，tiòh 圖謀 chiah-ê 好事。18 若會得 thang kap 眾人和，就 tiòh 盡力 kap in 和。19 所疼 ê 兄弟 ah，莫得家己伸冤，tiòh 忍氣 khah 好；因為有記載講，主講，伸冤在 tī 我，我 beh 報應伊。20 若是你 ê 對敵 iau，tiòh hō 伊食；嘴乾，tiòh hō 伊 lim；因為行 án-ni 是將熱熱 ê 火炭疊 tī 伊 ê 頭殼頂。21 莫得 hō pháiⁿ khah 贏，tiòh 用好 khah 贏 pháiⁿ。

共同經課 - 4 馬太福音十六章二十一節~二十八節

21 Tùi hit tiáp 起，耶穌 chiah 指示伊 ê 學生知伊 tiòh 去耶路撒冷，tùi chiah-ê 長老、祭司頭、經學士受 tiòh choē-choē 苦楚；koh 受害死，第三日 koh 活。22 彼得牽伊，責備伊講，主 ah，千萬 m̄-thang，chit-ê 決斷無 beh 到 tī 你。23 耶穌 oát-tng 身，kā 彼得講，撒旦，退去我 ê 後面；你是我 ê 塞礙；因為你所想 m̄ 是上帝 ê 事，是人 ê 事。24 Hit 時耶穌 kā 伊 ê 學生講，人若 ài tè 我 tiòh 看無家己，giá 伊 ê 十字架，來 tè 我。25 因為見若 ài 救伊 ê 性命 ê，beh 失落伊；見若為 tiòh 我來失落伊 ê 性命 ê，beh 得 tiòh 伊。26 人若得 tiòh 全世界，來喪失伊 ê 性命，有甚麼利益？á 是人 beh 出甚麼來對換伊 ê 性命。27 因為人子用伊 ê 父 ê 榮光，kap 伊 ê 天使 beh 來，hit 時 beh 照 ták 人 ê 所行來報應。28 我實在 kā lín 講，Khiā tī chia ê，有人 iáu-bē 死，會看見人子 tī 伊 ê 國來。